


靖康要錄

一






錄 要 康 靖

(一)

詳 不 人 撰



叢書集成  
初編

商務印書館

本館據十萬卷樓  
叢書本排印初編  
各叢書僅有此本

# 刻靖康要錄敘

靖康要錄十六卷。不著撰人名氏。舊本題曰孝慈淵聖皇帝要錄。四庫全書本題曰靖康要錄。與書錄解題。文獻通考合。書錄解題曰。靖康要錄五卷。不著撰人名氏。自欽廟潛邸迄靖康元年十二月事。文獻通考同文淵閣書目亦著于錄。注曰二冊。愚謂書名孝慈淵聖皇帝要錄。直齋貴與。皆宋人。不應改題靖康。之目。且陳所見本。詎元年十二月事。今本記事。記言至二年五月一日。高宗卽位。止多寡懸殊。起訖迥別。非一本也。四庫全書提要云。考書錄解題載欽宗實錄四十卷。乾道元年修撰洪邁等進。此必實錄既成之後。好事者撮其大綱以成。故以要錄名。案歷代實錄題名。皆全載諡法廟號。今以舊本題名證之。其爲實錄節本無疑。提要所言。誠定論也。文淵閣書目。字字號別。載宋朝要錄四十冊。註曰缺。恐當時每朝實錄。皆有節本。今僅存靖康一朝耳。宋時常有刊本。近古藏家。惟傳抄帙。是本凡遇聖旨。聖慈御札等字。皆提行。桓字構字。皆注御名。當從宋本錄出。惜展轉傳抄。譌奪幾不可讀。因取所藏三本。互相讐校。又證以徐夢莘北盟會編。楊仲良長編紀事本末。陳均九朝編年備要。李憲十朝綱要。無名氏宋史全文。趙忠定諸臣奏議諸書。增補凡數百字。改正凡數千字。付之梓人。明知其誤。而無可校正者。仍之。別爲校勘記。附于後。書中事迹。多可補宋史之缺。王維儉撰宋史記。柯維騏撰宋史新編。皆未見其書。後有改修宋史者。其將有取于斯乎。

光緒十二年歲在柔兆闍茂霜月既死霸誥授榮祿大夫三品頂戴前分巡廣東高廉兵備道加四級歸  
安陸心源撰

# 靖康要錄卷第一

孝慈淵聖皇帝御名道君太上皇帝長子。母曰惠恭皇后王氏。以元符三年四月十三日生於坤甯殿。九月賜名亶。授檢校太尉山南東道節度使韓國公。

建中靖國元年六月。遷開府儀同三司。興德軍節度使。進封京兆郡王。

崇甯元年二月。改賜名焯。八月。又改賜今名。

大觀元年十一月。詔曰。朕荷天眷祐。景命有僕。承家之慶。是生多男。年近幼學。未親師友。因嚴以教。宜及其時。京兆郡王御名高密郡王楷。可於來春擇日出就外學。其輔導講讀之官。宜以端亮鯁直有文學政事人充選。以稱朕意。記室翊善。可如王友例。令王答拜。于是以秘書監蔡宏爲翊善。左司員外郎沈錫爲侍講。國子司業汪澥爲記室。安德軍節度留後知入內侍省楊震提舉管勾本位。大觀二年正月。遷司空。武昌軍節度。進封定王。八月。以國子祭酒汪澥爲翊善。起居郎翟汝文爲侍講。起居舍人俞稟爲記室。俞稟遷。以起居郎石公弼代之。會惠恭皇后崩。至政和元年二月。始詔太史擇日。以三月己丑出就資善堂聽講讀。以光祿少卿李詩爲翊善。辟離司業耿南仲爲侍講。司門員外郎鄭修爲記室。甲寅。詔宰臣執政官許就資善堂見定王御名嘉王楷。王迎揖于門。升堂就坐。王西向。宰臣執政官東向。送亦如之。二年九月。侍講鄭居中因奏事講筵。乞講讀官至資善堂見二王。許之。四月。鄭修卒。以左司員外郎張叔

夜爲記室。叔夜罷。以符寶郎陳鶚代之。

三年正月。改官制。授少保。

四年二月甲戌。行冠禮于文德殿。或云福常殿。先是御製冠議。降議禮局。載五禮新儀之首。至是始舉行焉。

三月辛卯。詔曰。若昔明王。誕受厥命。建立儲貳。以係天下之心。朕嗣無疆大歷。荷天之休。誕育元良。是居冢嫡。長子御名年逮志學。冠于治朝。百辟具瞻。主器之長。永惟宗廟之重。父子之恩。考循舊章。正位東宮。明兩作離。爲國大本。可以來春出閣。立爲皇太子。其建宮室。設官屬。與儀物制度。宜令有司討論典禮。前期辦具。以開邦家之慶。與四海共之。十一月己亥。詔皇太子慶會上壽。押百僚班。又詔皇太子謁廟時。許逐室行禮。

五年二月乙巳。制曰。若昔先王。必建儲貳。以隆萬世之統。以係四海之心。朕撫世承平。念國大本。適追來孝。垂裕後昆。永唯承宗之艱。莫如主器之長。咨爾萬邦之有衆。聽予一人之告猷。皇長子少保武昌軍節度使定王孝友。得于天資。溫良成于日就。出學外傳。率履無違。旣冠阼階。其儀可象。方景命有僕。介壽考之萬年。而明兩作離。兆本支之百世。蔽自朕志。格于天心。孚吉大廷。用申錫類。夫慎乃德。惟忠惟孝。欽汝止。惟幾惟康。用克相于我家。以對揚于休命。可立爲皇太子。仍令所司擇日。備禮冊命。丁未出閣。詔改其閣爲府。甲寅。有司備法駕儀仗。列于大慶殿。文武百官。各服朝服。立班于庭。執事官入就位。皇帝服通天



冠絳紗袍。御殿皇太子冠遠遊冠。衣朱明衣。執桓圭以入。受冊于庭。以翰林學士承旨強淵明爲禮儀使。翰林學士王勳撰冊文。冊文闕。或云劉正夫撰。書如是。則禮儀使亦當用執政。宣和殿學士蔡攸書冊。殿中監高伸書寶。禮畢。太師魯國公蔡京率百官稱賀訖。又詣東宮賀皇太子。如故事。以戶部尙書劉炳。翰林學士承旨強淵明爲賓客。中書舍人蔡靖。陳邦光。並爲詹事。祕書監李詩爲顯謨閣待制。左庶子兼侍讀宗正少卿耿南仲爲徽猷閣待制。右庶子兼侍講祕書少監蘇桓改名燁爲左諭德。太常少卿葛次仲爲右諭德。國子司業曾楙。殿中侍御史華寔並爲舍人。知入內內侍省楊震。董懋提舉左右春坊事。內侍容機。黎景年。全淵。張彥卿。周珣。王若沖。王珂。管勾左右春坊事。劉淵爲家令。皇甫僅爲承受。丁巳。備法駕謁太廟。奏免乘金輅及用鹵簿。止依常儀乘馬。至太廟。易朝服行禮。又奏乞免官僚稱臣。並從之。

戊午。奏臣竊觀自昔東宮建司設局。張官置吏。往往竊有所擬。無所不備。考其執事實無毫末。顯是慕爲虛名。徒費廩食。書曰。慎乃儉德。惟懷永圖。臣立身之始。敢不念茲。伏望聖慈詳察。應東宮官吏不必具備。諸司庶局。頗令兼攝。至于閑徒冗卒。舊例有者。亦可蠲除。務從儉約。如此。則不惟臣少安私分。仍得清心省事。專精問學。仰副君父教育之意。又奏。臣昨就資善堂聽讀。尋常須候邇英經筵已開。方取旨定日。恭惟聖學高妙。羣臣莫及。躬御經筵。但欲遵承祖宗故事。非待儒臣講說。修輔聖明。如臣之愚。正當力學。不可曠日。豈應擬視經筵。兼臣問安視膳之外。過還府第。綽有餘暇。況不同往日。深在禁嚴。出入不敢自便。今欲乞聖慈。許令每日不拘早晚。但稍有閒隙。卽請學官赴廳講讀。所貴爲學日益。有以副聖慈撫眷之

意。

九月乙酉。詔皇太子遇天壽節。赴垂拱殿上壽。于親王前別爲一班。家令劉淵罷。以梁平代之。

六年四月。以禮部尙書白時中。刑部尙書慕容彥逢爲賓客。吏部侍郎劉煥。給事中。方會爲詹事。太常少卿賈安宅爲舍人。內符寶郎馮楊爲家令。

六月乙亥。詔納故少傅恩平郡王朱伯材女孺人朱氏爲妃。令所司備禮冊命。是月癸未。親迎。癸丑。詔自今車駕行幸。皇太子免起居從駕。

七年十月。生子爲嫡皇孫。封秩比皇子。以起居郎李彌大。起居舍人趙野爲舍人。彌大。野辭。以太常少卿柯棐爲右文殿修撰。國子司業魏憲直龍圖閣專其事。

八月。劉煥。方會罷。以左庶子李詩。右庶子耿南仲爲詹事。宣和九年。以祕書少監曾楙。祕書監王易簡爲舍人。曾楙遷。以國子司業程振代之。至七年。李詩卒。以禮部侍郎王易簡爲顯謨閣直學士。充詹事兼侍讀。上聰明仁孝。好學而喜文。自以地偏而望崇。每懷兢畏。講讀之暇。唯以鬆器貯魚而觀之。他事一不關懷。人莫能測也。

宣和七年十二月。皇太子除開封牧。二十日。差內使梁邦彥。黃僅押賜皇太子碾玉龍束帶一條。不許辭免。

二十二日。閣分大內娘子用小轎十餘乘。入東宮府議事。二十三日。申時後入內。內侍官黃僅傳聖旨押

皇太子入殿內。續有快行親從官十餘人。催上馬入殿。至夜不出。至五更。太上皇帝徑出殿。住龍德宮。寧德皇后出住攝景園。改充寧德宮。是日。皇太子登寶位。

先是。太上皇帝御玉華閣。先詔宰執及給事中吳敏等。日晡。內禪之議已決。擢吳敏爲門下侍郎。草傳位詔。召百官班垂拱殿下。宣示詔旨。是夕。命皇太子入居禁中。覆以御袍。皇太子俯伏感涕。力辭。因得疾。召東宮官耿南仲視醫藥。至夜半少蘇。翌日。又固辭不從。及卽大位。御垂拱殿。見宰執百官。大赦天下。

宣和七年十二月二十三日庚申。皇帝卽位。壬戌。制曰。我國家創業守成。紹二百年之祚運。宅中圖大。奠三萬里之幅員。施及眇躬。嗣膺神器。永念繼承之重。懼及春冰。載惟臨馭之艱。凜深朽索。矧今邊陲未靜。師旅方興。肆推曠蕩之恩。用慰邇遐之望。可大赦天下。應常所不原者。咸赦除之。

制以皇太子妃朱氏可立爲皇后。

癸亥。詔越王、燕王賜入朝不趨。贊拜不名。

詔梁方平將兵七千守濬州。何灌將兵二萬守河津。以探報虜騎漸逼故也。

丙寅。詔上道君皇帝尊號曰教主道君太上皇帝。道君皇后曰道君太上皇后。令禮官討論典禮。

靖康元年正月一日丁卯。皇帝御明堂青陽左个。以歲運播告天下。又詔班月朔。受百官朝賀。退詣龍德宮。朝賀太上皇帝。百官班門外。宰相執政進見。

御。扎朕光膺眷佑。寅奉燕詒。載惟菲薄之資。獲撫盈成之運。宵衣罔怠。盱食靡遑。發政施仁。懷日靖四方。

之志。經文緯武。圖永康兆民之功。式紀初元。是新美號。庶格神靈之助。遂臻華夏之和。茂謹王春。豈特遵魯史踰年之義。適寧國步。蓋將紹周人過歷之期。自宣和八年正月一日。改爲靖康元年。布告多方。咸體朕意。

詔曰。朕聞木從繩則正。后從諫則聖。若古有訓。朕甚慕焉。內顧眇躬。獲保大器。未燭治道。若臨深淵。思聞蓋言。以輔不逮。應朝廷之闕失。政令之僻違。保邦御俗之方。安民禦戎之策。詢于有衆。咸極敷陳。惟骨鯁是求。惟藥石是用。毋或回隱。溺于導諛。咨爾忠良。竚聞正論。至於逆耳而利行。朕當舍己以從人。雖有過差。必無罪譴。朕言必信。衆聽無疑。自今中外臣僚。以至民庶。並許實封。直言得失。在京于合屬處投進。在外于所在州軍附遞。以聞。布告邇遐。咸知至意。

臣僚上言。應諸軍坐倉指揮。更不施行。從之。

二日聖旨。恭奉道君玉音。比以憂懃感疾。禱于太清。旋日康復。方晏處琳館。靡有萬機之繁。可以躬伸報謝。今春就貞元節前。擇日詣亳州太清宮燒香。朕祇奉睿訓。敢不欽承。其令有司前期戒具。供頓儲億。毋或不虔。御史中丞陸德先除職。與郡徽猷閣待制何奭除御史中丞。國子祭酒謝克家起居舍人唐重並除左諫議大夫。中書舍人王雲除給事中。侍御史鄭滋除中書舍人。國子司業孫覲除侍御史。任諒知京兆府。替盛章赴闕。

三日詔曰。朕以金國渝盟。藥師叛命。侵軼邊鄙。劫掠吏民。雖在續承之初。敢忘付託之重。事非獲已。師實

有名已戒六師躬行天討將士銳于敵愾夢卜肇于襲祥庶寧邦國之虞克紹祖宗之烈應親征合行事件令有司並依真宗皇帝幸瀛洲故事疾速檢舉施行

聖旨道君太上皇帝臨御天下常恐一物失所一民不被其澤朕每問安視膳親聞至訓而臣下之務爲誕謾蒙蔽四方利病不卽以聞比者發自睿旨親布德音凡擾民害物之事一切除去百姓伏讀流涕嘆息自今仰官司悉意奉行敢有苟簡滅裂懷奸挾情以沮格詔旨者並重行憲典

聖旨詔命之出以信四方倘朝令夕改人用不孚自今令三省詳議施行不得輕有改易使人心生疑惑凡詔勅有不經三省者官司不許施行違者並科違制之罪

聖旨方今軍興應內外官司局所除留後苑作製造御前生活所應副道君太上皇帝外其餘一切依熙豐法合罷者並罷錢物並歸左藏庫造納三省樞密院條具以聞由是凡一百五處皆罷之聖旨召募武學及第有材武方略或有戰功及曾經戰陣及經邊任大小使臣及諸色有膽勇敢戰之人聖旨祖宗典訓具存綱紀修明四方孚信朕初嗣大統當與執政大臣共遵成憲自今除授黜陟及恩赦等事並須參酌故實進呈取旨施行

吳敏除知樞密院事唐恪除吏部尙書李稅除同知樞密院事聖旨從官不才者並取旨罷在外從官填闕宋暎除徽猷閣待制添差發運使王時雍除戶部侍郎盧益除知東平府蔡簡除資政殿大學士知鎮江府聖旨朱勛放歸田里王黼責授崇信軍節度副使永州安置李彥賜死王黼李

彥並籍沒家產。

門下侍郎吳敏除親征行營副使。許便宜行事。

兵部侍郎李綱顯謨閣直學士聶山除親征行營使司參謀官。團結兵馬于殿前司。太保領樞密院事。蔡攸除恭謝行宮使。尙書右丞宇文粹中除恭謝行宮副使。廣陽郡王童貫除東京留守。奏報幹離不兵距河。濬州不守。梁方平戰。剋燒橋而遁。何灌軍馬望風潰散。賊遂渡河。是夜漏二鼓。道君太上皇帝出通津門東下。太上皇后及皇子帝姬等相續而行。侍從百官。往往潛遁。

四日聖旨。今來團結軍兵。禦捍賊馬。如立到功效。並當不用常制。倍加酌賞。兵部侍郎李綱除尙書右丞。東京留守。同知樞密院事。李稅除副留守。時從官以邊事求見者。皆非時賜對。綱侍班延和殿下。聞宰相執政欲奉鑾輿狩襄鄧。遇知東上閣門事朱孝莊。語之曰。有急切公事。欲與宰執廷辨。公能奏取旨乎。孝莊曰。宰執未退。而從官求對。前此無例。綱曰。此何時而用例耶。孝莊曰。諾。卽具奏。得旨引對。因奏聞諸道路。宰執欲奉陛下出狩以避狄。果行之。宗社危矣。且太上皇帝以宗社傳陛下。今捨之而去。可乎。上嘿然。太宰白時中曰。都城豈可以守。綱曰。天下城池。豈復有如都城者。且宗廟社稷。百官萬民所在。捨此何之。若能率厲將士。慰安民心。與之固守。豈有不可守之理。語未既。有內侍領京城所在。陳良弼自內殿出。奏曰。京城樓櫓剝修。百未及一二。又城東樊家岡一帶濠河淺狹。決難保守。願陛下詳議之。上顧綱曰。卿可同蔡懋。良弼往觀。朕于此俟卿。遂詣新城東壁。遍觀城濠。回奏延和殿。車駕猶未興也。上顧問如何。懋對

亦以城濠淺狹不可守。綱曰：城壁且高，樓櫓誠未備也。然不必樓櫓亦可守。濠河惟樊家岡一帶，以禁地不許開鑿，誠爲淺狹。然以精兵強弩占據，可以無虞。上顧宰執曰：策將安出？宰執皆嘿然。綱進曰：今日之計，莫若整齊軍馬，揚聲出戰，團結民心，相與堅守，以待勤王之師。上曰：誰可將者？綱曰：朝廷平日以高爵厚祿養大臣，蓋將用之于有事之日。今白時中、李邦彥等雖書生，未必知兵。然藉其位號，撫馭將士，以抗敵鋒，乃其職也。時中曰：李綱莫能將兵出戰。綱曰：陛下不以臣爲庸懦，倘使治兵，願以死報。第人微官卑，不足以鎮服士卒。上顧宰執曰：執政有何缺？趙野對曰：尚書右丞缺。時宇文粹中從道君東幸，故也。上曰：李綱除右丞，面賜袍帶并笏，上進膳訖，再召對于福壽殿，去留之計未決也。宰執又以去計勸。上詔綱留守，以李稅副之。綱力陳所以不可去者，且言：唐明皇聞潼關失守，卽時幸蜀。宗廟朝廷碎于賊手，累年然後僅能復之。范祖禹以謂其失在于不能堅守，以待勤王之師。今陛下卽大位，中外欣戴，四方之兵，不日雲集，虜騎必不能久留。捨此而去，猶龍脫于淵，車駕朝發而都城夕亂。雖臣等留守，何補于事？宗社朝廷且將邱墟。願陛下審思之上意，頗回而內侍王孝錫從旁奏曰：中宮國公已行，陛下豈可留此。上色變降榻曰：卿等毋留，朕將親往陝西，以復都城。決不可留此。綱固請，會燕越二王至，亦以固守爲然。上意稍定，卽取紙書可回二字，用寶俾中使追還中宮國公。因顧綱曰：卿留朕治兵禦寇，專以委卿，不管少有疎虞，綱皇恐受命。與李稅同出治事。是夕宿于尚書省，宰執宿于內東門，中宮國公之行已遠。是夕未還，中夜上遣中使令宰執供軍令狀，詰旦決行。

聖旨。聶山充留守。司隨軍計度轉運使。

五日聖旨。白時中授觀文殿大學士中太乙宮使。是日道路紛紛。復傳有南狩之事。太廟神主已出。寓太常寺。宰相至祥曦殿。則禁衛皆已擐甲乘輿服御。皆已陳列。六宮襍被。皆將升車。李綱厲聲謂禁衛曰。爾等願以死守宗社乎。願扈從以巡幸乎。禁衛皆呼曰。願以死守宗社。不居此。將安之。綱因拉殿帥王宗濋等入見曰。陛下昨夕已許臣留。今復戒行。何也。且六軍之情已變。彼有父母妻子。皆在都城。豈肯捨去。萬一中道散歸。陛下孰與爲衛。且虜騎已逼。彼知乘輿去不遠。以健馬疾追。何以禦之。上感悟。始命撤行。綱謁宰相曰。上意已定。敢有異議者斬。因出祥曦殿。傳旨宣示。禁衛皆拜伏呼萬歲。上復御宣德門。見將士。宰執百官。將士班樓前起居。上臨欄杆久之。復降輦。勞問將士。令大臣撰數十語。敕金人犯順。欲危宗社。決策固守。各令勉勵之意。俾閣門官宣讀。每讀一句。將士聲諾。于是固守之議始決。

聖旨。右丞李綱充親行營使。侍衛親軍步軍副指揮使曹矜充親行營副使。置司于大晟府。辟參謀官書寫機宜。勾當公事。管勾文字。准備差使。統制統領准備差使百餘人。選差三省吏部戶房人吏數十人。賜銀絹錢一萬貫。疋兩。文臣自朝請大夫以下。武臣自武功大夫以下。及將校官告宣帖三千餘道。一切許以便宜從事。

聖旨。六尚局並依祖宗法。

七日制曰。門下軌三光而遂萬物。允資當軸之勛。遜五品而鎮四夷。尤賴秉鈞之大。亟頒廷號。登冠台符。



起復銀青光祿大夫少宰兼中書侍郎李邦彥。俊德明諫。宏才遠器。學貫天人。而守之以虛靜之量。識窮治忽。而發之以忱恂之詞。蚤冠掄魁。旋持從橐。嘉猷婉畫。久翔政路之榮。偉譽英聲。寔亞冢司之重。粵自定策。彌見竭誠。日月增輝。方壯朝廷之勢。風塵有警。遵深邊鄙之虞。盡忠而人絕間言。制勝而慮無遺算。謝安之矯情鎮物。足抗符秦。李靖之料敵臨機。何憂突厥。國威旣振。民志以寧。是用序陞宅揆之官。進貳納言之任。文階峻陟。并賦陪敦。以彰體貌之嚴。以示倚畀之厚。惟時所望。非朕取私。於戲。杜如晦長于斷謀。坐翊隆平之運。姚元崇善于應變。永扶康泰之期。勉紹徽聲。佇觀丕績。可特授起復特進太宰兼門下侍郎。

制曰。股肱之起元首。庸聞帝舜之歌。舟楫之濟巨川。備載高宗之命。聿求雋望。式贊鴻圖。在考慎以惟精。願登庸之敢後。誕揚孚號。明告治廷。通奉大夫守中書侍郎張邦昌。識敏而器安。才全而學博。潔于行己。保禮儀廉恥之四維。端以立朝。茂正直剛柔之三德。粵登臚仕。亟告嘉猷。念天步之方艱。憂民心之未定。允資厭難。尤賴協恭。是用擢陞揆亞之崇。進貳上台之重。仍兼官于鳳沼。俾亮采于龍墀。併衍爰田。申加眞食。庸昭異數。益示殊私。以朕初載。論相之明。爲爾盛年。得君之寵。於戲。救寧中外。矯情當慕于謝安。鎮服邇遐。守正宜師于裴度。欽承予訓。益懋乃恭。可特授正奉大夫少宰兼中書侍郎。制曰。熙朝任相。當嚴進退之規。明主馭臣。宜厚始終之禮。惟時端揆。翊我初元。願謀國之未臧。肆推恩而許罷。特頒渙號。用賈具僚。特進太宰兼門下侍郎白時中。性稟中和。心存豈弟。蚤通經術。藹貢薛于韋之聲。晚被眷知。居蕭